

Headline	Ops Benteng tumpu kepada kapal, bot asing mencurigakan		
MediaTitle	Utusan Borneo Sabah		
Date	20 May 2020	Color	Black/white
Section	General News	Circulation	11,223
Page No	13	Readership	33,669
Language	Malay	ArticleSize	150 cm ²
Journalist	N/A	AdValue	RM 305
Frequency	Daily (EM)	PR Value	RM 914



Ops Benteng tumpu kepada kapal, bot asing mencurigakan

PELABUHAN KLANG: Bagi menyekat pendatang asing tanpa izin daripada masuk ke Malaysia ketika negara berhadapan dengan wabak COVID-19, Operasi Benteng yang melibatkan kerjasama bersepadu agensi-agensi penguatkuasaan negara dilancarkan dengan memberi tumpuan kepada bot atau kapal yang mencurigakan.

Ketua Pengarah Agensi Penguatkuasaan Maritim Malaysia (Maritim Malaysia) Laksamana Maritim Datuk Mohd Zubil Mat Som berkata menerusi operasi bersepadu yang melibatkan Maritim Malaysia, Polis Diraja Malaysia (PDRM) dan Tentera Laut Diraja Malaysia (TLDM), mana-mana bot atau kapal mencurigakan yang masuk ke perairan negara akan dipantau dan dipintas.

Beliau berkata Ops Benteng telah dimulakan sejak beberapa minggu lepas bersama aset TLDM dan PDRM dengan menempatkan 10 bot pemintas di kapal induk Maritim Malaysia di kawasan tertentu di sepanjang Selat Melaka.

"Bot-bot pemintas itu diletakkan dalam keadaan 'stand by mode' berhampiran kapal induk selama 27 jam agar mudah bergerak apabila sistem pengesanan radar kapal induk mengesan pergerakan mencurigakan di perairan negara," katanya kepada pemberita dalam tinjauan Op Benteng di sini.

Menurutnya bot-bot pemintas hanya menerima isyarat radar daripada kapal induk sebagai garis panduan untuk ke lokasi tertentu kerana ia sendiri

tidak mempunyai radar pengesanan, dan ia ditempatkan bersama dengan kapal induk agar dapat bergerak ke lokasi dengan lebih pantas sebaik sahaja bot atau kapal yang mencurigakan dikesan.

Mohd Zubil berkata pihaknya tidak mahu ada kes-kes COVID-19 daripada kalangan pendatang tanpa izin, menceroboh sempadan negara untuk bekerja secara haram.

"Sekiranya mereka ini berjaya menjejakkan kaki di negara ini melalui jalan yang tidak sah, maknanya misi kami telah gagal dan kita (mungkin) akan melihat kemunculan kluster jangkitan yang baharu," katanya.

Sehubungan itu beliau turut memberi amaran keras kepada tekong tempatan mahupun tekong luar yang menyediakan penginapan buat pendatang tanpa izin.

"Kesemua pergerakan tekong akan dipantau tidak kira sebarang laluan sekalipun. Mereka kena ingat, kita ada aset udara yang dibantu oleh Tentera Udara Diraja Malaysia dan Pasukan Gerakan Udara membuat pemantauan serta rondaan pada waktu siang dan malam," katanya.

Op Benteng diaktifkan di bawah National Task Force yang diterajui oleh Angkatan Tentera Malaysia, PDRM dan Maritim Malaysia untuk mengawal ketat sempadan negara secara bersepadu daripada dibolosi pendatang tanpa izin bagi mengekang jenayah rentas sempadan selain menyekat penularan wabak COVID-19. — Bernama